

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Un felis dia pa bo. Danki pa subi riba nos plenchi di skol. Si si kosnan a normalisá i welganan a keda tras di nos. Nos ta kontentu ku e tumbanan ku a zona den festival center. Korsou ta den su Gloria, ehe esta un mensahe bunita. Dibo ta grandi, un kantante i kompositor talentoso. Pero mas ku tur kos un personalidat masha bunita. E kantika ta pas ku su manera di ta. EL a bibe i bistié i awor nos tur ta bai sigui zona i proklamá ku Korsou ta den su Gloria.

Anto e tumba di Ray Lauffer a lanta tur hende i duna kipevel. “Ban pa bai”. Tambe asina bunita kantá i biba. Pabien na ambos hóben talentoso. Den e karnaval aki nos lo ekspresá:

**Ta mi tempu,
Bientu fresku,
Te koi mi ke sinti!**

**Pa kara di mi mama,
Ban pa bai,
Korsou ta den su Gloria!**

Riba roster

LECTIO DIVINA

“Felis ta boso ku ta pober, reino di Dios ta pa boso.
Felis ta boso ku tin hamber aworakí; boso lo hari.
Ma ai di boso, boso ku ta riku, ya boso a haña boso konsuelo!
Ai di boso ku ta kana ku barika yen, boso lo pasa hamber!
Ai di boso ku aworakí ta hari, boso lo bisti rou i yora!

ORASHON:

Den Bo man mi ta pone Señor tur momento ku mi tabata tristu.

Señor transformá mi sufrimentu i tristesa den alegria. Amèn.

REFLEKSHON:

Ta difísil pa pensa ku un hende ku ta pober i tin hamber por ta felis. Mas fásil nos ta pensa ku felis ta esun riku. Pero den realidat tin hende ku ta pober i nan ta felis, pasobra tin amor den nan bida i tin hende ku tin tur kos, pero nan no tin amor i nan ta infelis.

Pero kiko Hesus kier men den evangelio di awe?

Hende ku tin ménos kosnan material, mas fásil nan ta buska Dios i mas fásil nan ta kompartí ku otro.

Hende riku ku ta fiesta tur ora, kome loke nan kier, kumpra loke nan kier por lo general nan no ta sinti falta di Dios. Den efekto nan bida sin Dios i sin kompartí ku otro ta hiba nan pa kondenashon.

Un dia ora nan ta pará dilanti di Dios ku man bashí nan lo yora.

En kambio esnan ku semper a buska Dios i kompartí ku otro lo ta felis pa semper.

Kiko ta hasi bo kontentu? DIOS òf kosnan material?

Not'é riba bòrchi

Soto,

Kolegio Don Sarto ta un dushi skol, situá den e barío di Soto.. Nos skol a wòrdu fundá dia 1 di mart 1957. Pues e aña aki skol lo kumpli 62 aña di eksistensia. E nòmber ku nos ta karga ta nòmber di Papa Pius X.

Nos ta den e dushi temporada di Karnaval I nos ta duna nos maksimo pa aportá na 50 aña Karnaval Banda Bou. Ku orguyo nos ke laga boso sera konosí ku nos reinanan di skol .

Alany Rafaela a bai ku e titulo di promé finalista I Sheritian Sophia ku a bai ku e premio di trahe mas impaktante.

Tambe nos ta orguyoso di nos Pancho Nedion Sluis ku a bai ku e titulo di dos finalista prens ku pachó hubenil Korsou I e duo mas amistoso.

E aña eskolar aki nos tabatin algun proyekto den skol pa yuda aportá na e parti kognitivo di e alumno.

Proyekto di SEED kaminda nos alumnonan a siña diferente manera pa krea energia.

Riba tereno di deporte tambe nos alumnonan ta destaká tur aña din obo.

Pa basta aña konsekutivo Kolegio Don sarto ta sali den e miho 3 ekiponan ganado den e deporte di futbòl. Esaki ta tantu nos tim maskulino I femenino.

Riba potret nos alumno ekselente di aña eskolar 2018 – 2019.

Jeheiny Florencia.

Pabien Jeheiny nos di Kolegio Don Sarto ta masha orguyoso di bo







Den agènda

Dianan liber

25 februari manisé di karnaval hubenil

4 te ku 8 despues karnaval grandi

18 te 27 di aprel pasku grandi

Mi ta konta

Sera konosí

Brainard Martina entrante 1 di februari 2019 a aseptá e funshon di direktor di finansas, mantenshon i IT na RK.

Brainard ta Register Accountant i tin hopi aña di eksperensha den e ramo di akountant.

Brainard ta kasá ku Lisette Martina- Rijnschot. E tin un yu hòMBER i un yu muhé.

Loke ta hasi Brainard felis ta su relashon ku Señor na promé lugá. Su famia ta otro fuente di felisidat. Felisidat ta e sensashon dushi ora bo por hasi algu pa un otro, i mirá e otro felis.

Loke por despuntá Brainard, ta e falta di seriedat, kompromiso o enfoke di otronan pa logra e metanan komun.

Brainard por rabia ora e sinti inhustisia, pero el a siña pa dominá su mes den kualke situashon i atendé ku kada problema ku kalmu.

Kumindanan ku Brainard gusta ta diferente. Serka su mama e ta disfrutá di un aros bruá i diferente kuminda krioyo. Ku su kasá e ta gusta kome sushi.

Kant'i laman Brainard ta sinti'é dushi i relahá. Otro manera pa e relahá ta dor di hasi deporte, toka piano o skucha musika jazz.


Su mama a siñe pa e biba su fé katóliko. Hopi biaha el a tende su wela i su mama enkurash'é ku e frase: Biba bo fé Brainard. El a sigui e konseho aki i esaki ta enrikesé su bida. Tambe su mama a siña tur su 3 yu hòmbenan pa nan por soru pa na mes i nan ambiente. Nan a siña laba paña, limpia kas etc.

Su tata, q.e.p.d., a siñ'é hasi tur trabou di reparashon na kurpa di kas.

Di su yunan el a siña pa e tin hopi pasenshi i papia hopi.

Su bestia preferí ta kachó. Boefi ta nan Fila Brasileiro masha stimá.

Bon bini na Brainard Martina.



Mucha Djispou

Abuelo: “Awendia tin Ipad, Tablet, komputer. Antes nos tabata djis usa nos kabes”

Nietu: “Opa awel mi no ta ripará ku opa ta usa opa su kabes. E kosnan di mas fásil opa no por hasi. Ni sende televishon, nimi tin ku hasi pa opa riba telefon of komputer.”